

Jalan alternatif untuk penduduk Sungai Maong, Segedup, Satok

KUCHING: Pembinaan Jalan Sungai Maong ke Segedup akan memberikan pengalaman perjalanan yang lebih baik kepada penduduk setempat apabila siap kelak.


Timbalan Ketua Menteri Tan Sri Datuk Amar Dr. James Jemut Masing berkata projek tersebut adalah antara projek inisiatif Kerajaan Sarawak di Bahagian Kuching.

"Pada ketika ini, ia adalah satu-satunya jalan yang dilalui penduduk setempat untuk ke bandar dan tetap perlu melalui Jalan Batu Kawa.

"Objektif utama projek berkenaan ialah membina jalan baharu berstandard U3 JKR (Jabatan Kerja Raya) menghubungkan Kampung Sungai Maong dan Kampung Segedup serta menaik taraf jalan kampung sedia ada kira-kira 600 meter," katanya.

Menteri Infrastruktur dan Pembangunan Pelabuhan itu berkata demikian ketika ditemui pada Majlis Pecah Tanah Projek Jalan Sungai ke Segedup bertempat di Kampung Segedup di sini, semalam.

Menurutnya, jalan tersebut akan memberi pilihan atau jalan alternatif kepada penduduk tempatan untuk pergi ke bandar terutama di



TAN Sri Datuk Amar James Jemut Masing

sebelah utara Kuching.

"Laluan yang dicadangkan bermula dari bulatan yang ada di Jalan Datuk Temenggong Tan Meng Chong. Jalan tunggal yang dicadangkan ini panjangnya kira-kira 3.6km dan terdiri daripada dua jambatan konkrit bertetulang yang dicadangkan melintasi Sungai Maong (80 meter) dan Sungai Pedada (54m meter).

"Selain itu, Kampung Sungai Maong akan dihubungkan dengan jalan baharu yang dicadangkan melalui jalan tunjang sepanjang 69 meter," jelasnya.

Jelasnya, projek berkenaan dijangka siap pada Januari 2022 dan penyediaan jalan berkenaan ia akan

membantu menyelesaikan masalah kesesakan trafik antara Matang, Satok dan Batu Kawa.

"Kita berharap jalan ini akan menyediakan perhubungan yang lebih lancar, selamat dan pantas kepada penduduk yang tinggal di sekitar Sungai Maong, Segedup dan Satok.

"Jalan ini juga dipecayai akan memberi pengalaman pemanduan yang lebih baik selain memberi manfaat sosioekonomi serta merta dan jangka panjang kepada penduduk setempat serta pembangunan secara keseluruhannya," ujarnya.

Dengan perkembangan infrastruktur ini, beliau berkata Sarawak selangkah lebih dekat untuk merealisasikan impian menjadikan negeri paling maju di Malaysia menjelang 2030.

"Saya percaya kita semua menantikan perkembangan yang akan datang yang akan memberi kesan besar kepada sosioekonomi Sarawak ini.

"Saya menyarankan agar semua rakyat Sarawak tetap bersatu, walaupun dalam keadaan politik yang mencabar, dan mengutamakan hak kita sebagai rakyat Sarawak untuk memastikan pembangunan Bumi Kenyalang," katanya lagi.